

Datë 26/02/2022

KALLZIM PENAL

- KALLZUES:** **Dritan Shakohoxha**, në cilësinë e kandidatit për President të Federatës Shqiptare të Futbollit.
- ME OBJEKT:** Kallëzim i veprës penale të “*Pengime per ekzekutimin e vendimit të gjykatës*”, “*Veprime në kundërshtim me vendimin e gjykatës*” dhe “*Shpërdorim detyre*”, parashikuar nga neni 320, 321 dhe 248 i Kodit Penal.
- KUNDËR:** **Z. Ilir Shulku**, me detyre Sekretar i Përgjithshëm i Federatës Shqiptare të Futbollit.
- BAZA LIGJORE:** Nenet 280, 283 të K.Pr.Penale dhe neni 248, 320 dhe 321 i Kodit Penal.
- DREJTUAR:** Prokurorisë së Rrethit Gjyqësor Tirane.
Drejtorisë Vendore së Policisë së Shtetit Tiranë.
- PËR DIJENI:** Prokurorisë së Përgjithshme.

I nderuar Z. Prokuror!

Bazuar ne nenet 280 dhe 283 të K.Pr.Penale parashtrojmë këtë kallëzim penal për veprat penale të sipërcituar, duke parashtruar rrethanat e fakteve konkrete ku bazohet kallëzimi, provat me të cilat vërtetohen këto fakte si dhe dispozitat ligjore penale të cënuara.

RRETHANAT E FAKTEVE

Kallëzimi mbështetet në veprimet e kundraligjshme të ndërmarra nga shtetasit Ilir Shulku, në procedurat e ndjekura për zhvillimin e mbledhjes së Asamblesë së Përgjithshme të Federatës Shqiptare të Futbollit e planifikuar për t’u zhvilluar me datë 2 Mars 2022. Në vijim Ju parashtrojmë në mënyrë përmbledhëse rrethanat e faktit e vertetuar me prova mbështetëse, konkretisht:

Rezulton se me datë 2 Mars 2022 ka qënë planifikuar të zhvillohej mbledhja e Asamblesë së Përgjithshme të Federatës Shqiptare të Futbollit, për zgjedhjen e Presidentit të FSHF-së. Në kushtet kur janë konstatuar shkelje të rënda të Statutit dhe të

Rregullores së Përgjithshme të Federatës Shqiptare të Futbollit, përsa i përket procedurave të përzgjedhjes së delegatëve nga Shoqatat Rajonale të Futbollit, anëtare në Asamblene e Përgjithshme, rezulton se Akademia Luftëtari (organizatë jo-fitimprurëse), në cilësinë e anëtarit të drejtpërdrejtë të Shoqatës Rajonale të Futbollit Gjirokastër, ka paraqitur në Gjykatën e Rrethit Gjyqësor Tiranë, kërkesë për sigurim padie, duke kërkuar pezullimin e efekteve juridike të vendimit Nr. 1, datë 10.01.2022 të Komisionit të Verifikimit të FSHF-së, si dhe cdo veprimi apo akti tjetër të dalë në zbatim të këtij vendimi që ka për synim realizimin e mbledhjes së Asamblesë së Përgjithshme të Zgjedhore të Federatës Shqiptare të Futbollit, të datës 2 Mars 2022.

Rezulton se Gjykata e Rrethit Gjyqësor Tiranë, me vendimin Nr. 274 Rregj. Themeltar, datë 17.02.2022, ka vendosur:

Pranimin e kërkesës. Marrjen e masës së sigurimit të padisë duke vendosur:
1. Pezullimin e efekteve juridike të vendimit Nr. 1, datë 10.01.2022 të Komisionit të Verifikimit të FSHF-së, si dhe cdo veprimi apo akti tjetër të dalë në zbatim të këtij vendimi që ka për synim realizimin e mbledhjes së Asamblesë së Përgjithshme Zgjedhore të Federatës Shqiptare të Futbollit, të datës 02.03.2022, deri në zgjidhjen e konfliktit me një vendim gjyqësor të formës së prerë.

2. Pezullimin e efekteve juridike të vendimit të datës 21.01.2022 të Komitetit Ekzekutiv të FSHF-së, si dhe cdo veprimi apo akti tjetër të dalë në zbatim të këtij vendimi që ka për synim realizimin e mbledhjes së Asamblesë së Përgjithshme Zgjedhore të Federatës Shqiptare të Futbollit, të datës 02.03.2022, deri në zgjidhjen e konfliktit me një vendim gjyqësor të formës së prerë.

3. Pezullimin e veprimtarisë së Komisionit të Verifikimit të FSHE-së, në ushtrimin e kompetencave të tij statutore për organizimin, mbikqyrjen dhe drejtimin e Asamblesë së Përgjithshme të FSHF-së, deri në zgjidhjen e konfliktit me vendim gjyqësor të formës së prerë.

Kundër këtij vendimi lejohet ankimi i vecantë në Gjykatën e Apelit Tiranë, brenda 5 ditëve nga e nesërmja e komunikimit të vendimit të arsyetuar.

U shpall në Tiranë me datë 17.02.2022.

Në seancën gjyqësore të datës 17.02.2022, rezulton se Federata Shqiptare e Futbollit në cilësinë e personit të tretë është përfaqësuar në gjykim nga përfaqësuesi ligjor dhe nga personi i autorizuar z. Aldi Topçiu, me detyrë Drejtor i Departamentit Juridik pranë FSHF-së. Ndodhur para këtij fakti, FSHF-ja ka marrë dijeni në mënyrë të drejtpërdrejtë në lidhje me vendimin gjyqësor të sipërcituar, pasi përfaqësuesit e FSHF-së kanë marrë pjesë në seancën gjyqësore të shqyrtimit të kërkesës për sigurim padie, si dhe kanë marrë pjesë në seancën e shpalljes së vendimit gjyqësor.

Në kundërshtim me vendimin gjyqësor të sipërcituar, rezulton se me shkresën Nr. 108 Prot, datë 21.02.2022, dërguar nga FSHF-ja, konkretisht nga z. Ilir Shulku Sekretari i

Përgjithshëm i FSHF-së, kallzuesi në cilësinë e kandidatit për President të FSHF-së, është informuar në lidhje me vijimin e procedurave të zhvillimit të mbledhjes së Asamblesë së Përgjithshme Zgjedhore të Federatës Shqiptare të Futbollit, të datës 02.03.2022. Konkretisht nëpërmjet shkresës së sipërcituar është vënë në dispozicion lista e anëtarëve të Asamblesë së Përgjithshme të FSHF-së dhe delegatët e tyre, pjesmarrës në mbledhje.

Qartësisht konstatohet se Sekretari i Përgjithshëm i Federatës Shqiptare të Futbollit, vijon procedurat për zhvillimin e mbledhjes së Asamblesë së Përgjithshme Zgjedhore të Federatës Shqiptare të Futbollit, në shkelje flagrante me vendimin Nr. 274 Rregj. Themeltar, datë 17.02.2022, të dhënë nga Gjykata e Rrethit Gjyqësor Tiranë, ku është vendosur pezullimi i plotë i procesit zgjedhor për zgjedhjen e Presidentit të FSHF-së, deri në marrjen e vendimit gjyqësor të formës së prerë që lidhet me paditë gjyqësore të depozituara në Gjykatën e Rrethit Gjyqësor Tiranë. Pasi janë konstatuar një sërë shkeljesh ligjore nga strukturat pranë FSHF-së, si dhe janë konstatuar shkelje në mbledhjet e zhvilluara nga Shoqatat Rajonale të Futbollit, në lidhje me për zgjedhjen e delegatëve pjesmarrës në Asamblenë e Përgjithshme të FSHF-së.

Në nenin 210 të Kodit Procedurës Civile, parashikohet se:

Ankimi kundër vendimit që lejon masën e sigurimit, nuk pezullon ekzekutimin e tij.

Ankimi kundër vendimit me të cilin zëvendësohet ose hiqet masa e sigurimit, pezullon ekzekutimin e tij.

Bazuar në parashikimet ligjore të nenit 210 të Kodit të Procedurës Civile, konstatohet se vendimi gjyqësor Nr. 274 Rregj. Themeltar, datë 17.02.2022, i dhënë nga Gjykata e Rrethit Gjyqësor Tiranë për “sigurim padie” është menjëherë i ekzekutueshëm dhe ankimi në Gjykatën e Apelit Tiranë, nuk pezullon ekzekutimin e tij.

Ndodhur para këtij fakti, kërkojmë marrjen e masave të menjëhershme dhe ndjekjen penale të shtetasit Ilir Shulku me detyrë Sekretar i Përgjithshëm i Federatës Shqiptare të Futbollit, i cili vijon të ndërmarrë veprime të kundraligjshme në shkelje të urdhërimeve të vendimit Nr. 274 Rregj. Themeltar, datë 17.02.2022, të dhënë nga Gjykata e Rrethit Gjyqësor Tiranë, si dhe duke ndërmarrë veprime të drejtpërdrejta me qëllim pengimin e ekzekutimit të vendimit gjyqësor përkatës, ku është vendosur pezullimi i plotë i procesit zgjedhor për zgjedhjen e Presidentit të FSHF-së, deri në zgjidhjen e ceshtjes me vendim gjyqësor të formës së prerë. Shkeljet e realizuara nga shtetasi Ilir Shulku janë bërë me një qëllim të vetëm, ndikimin apo paracaktimin e rezultatit të mbledhjes së Asamblesë së Përgjithshme Zgjedhore, duke favorizuar drejtuesin aktual të FSHF-së.



LIGJI I APLIKUESHËM

Kodi i Procedurës Penale, në nenet e tij 280 dhe 283 parashikon se:

Neni 280

Marrja dijëni për veprën penale

Prokurori dhe policia marrin dijëni për veprën penale me iniciativën e vet dhe me njoftimin e bërë nga të tjerët.....

Neni 283

Çdo person që ka marrë dijëni për një veprë penale që ndiqet kryesisht duhet ta kallëzojë atë. Në rastet e caktuara me ligj kallëzimi është i detyrueshëm.....

1. Nga ana tjetër Kodi Penal në nenin 320 parashikon se:

Fshehja, tjetërsimi, konsumimi, dëmtimi apo shkatërrimi i sendeve për të cilat është marrë një vendim prej gjykatës, ose kryerja e veprimeve të tjera të bëra me qëllim që të mos ekzekutohet ose të pengohet ekzekutimi i vendimit gjyqësor, përbën kundërvajtje penale dhe dënohet me gjobë ose me burgim gjer në dy vjet.

Objekti i kesaj vepre penale janë mardheniet juridike të vendosura për të siguruar veprimtarinë e rregullt të organeve gjyqësore të cilat pengohen në zbatimin e vendimeve gjyqësore, të mbrojtura posaçërisht nga legjislacioni penal nga veprimet ose mosveprimet kriminale.

Nga ana objektive, vepra penale kryhet me veprime aktive të kundraligjshme në formë të ndryshme, duke synuar pengimin e ekzekutimit të vendimit gjyqësor.

Subjekt i vepres penale, është çdo person që ka mbushur moshën për përgjegjësi penale dhe është i përgjegjshëm.

Nga ana subjektive, vepra penale kryhet me dashje direkte, me qëllim për të penguar ekzekutimin e vendimit gjyqësor.

2. Nga ana tjetër Kodi Penal në nenin 321 parashikon se:

Kryerja e veprimeve në kundërshtim me vendimin e gjykatës në lidhje me detyrimet e lindura nga dënimet plotësuese të dhëna prej saj, përbën kundërvajtje penale dhe dënohet me gjobë ose me burgim gjer në dy vjet.

Kryerja e veprimeve në kundërshtim me vendimin e gjykatës, në lidhje me detyrat e lindura nga urdhrat e mbrojtjes të dhëna prej saj, përbën kundërvajtje penale dhe dënohet me burgim gjer në dy vjet.

Objekti i kesaj vepre penale jane mardheniet juridike te vendosura me ligj për të siguruar zbatimin e vendimeve gjyqësore në lidhje me detyrimet e lindura nga dënimet plotësuese të saj, te mbrojtura posacerisht nga legjislacioni penal nga veprimet ose mosveprimet kriminale.

Nga ana objektive, vepra penale kryhet me veprime aktive të kundraligjshme për të kundërshtuar vendimin e gjykatës në lidhje me detyrimet e nga dënimet plotësuese të saj, të tilla vendime si sigurim padie.

Subjekt i vepres penale, eshte cdo person qe ka mbushur moshen per pergjegjesi penale dhe eshte i pergjegjshem.

Nga ana subjektive, vepra penale kryhet me dashje direkte.

3. Nga ana tjetër Kodi Penal në nenin 248, parashikon se:

Kryerja ose moskryerja me dashje e veprimeve a e mosveprimeve në kundërshtim me ligjin, që përbën mospërbushje të rregullt të detyrës, nga personi që ushtron funksione publike, kur i kanë sjellë atij ose personave të tjerë përfitime materiale ose jomateriale të padrejta a kanë dëmtuar interesat e ligjshëm të shtetit, të shtetasve dhe të personave të tjerë juridikë, nëse nuk përbën veprë tjetër penale, dënohet me burgim deri në shtatë vjet.

Që të jemi përpara rastit të konsumimit të një vepre penale, duhen analizuar këto elemente të figurës së veprës penale: **objekti, ana objektive, subjekti, ana subjektive**. Që të konkludohet se të një subjekt ka konsumuar veprën penale “Shperdorimi i detyres” duhet që të evidentohet pikë së pari ekzistenca e të gjithë elementëve të kësaj figure vepre penale, në veprimet e tij. Ashtu siç trajtohen në teorinë e së drejtës penale materiale, elementët e veprës penale janë katër, objekti, ana objektive, subjekti dhe ana subjektive, të cilët duhet të bashkëekzistojnë njëkohësisht në mënyrë që një person të merret në përgjegjësi penale.

Referuar nenit 248 te K. Penal, ligjvëniesi ka parashikuar mbrojtje te posaçme per marrdheniet juridike te vendosura nga shteti me ligj apo me akte nenligjore per te siguruar veprimtarine normale te aparatit shteteror si dhe mbrojtjen e te drejtave dhe interesave te ligjeshme te shtetasve ose shtetit; cenimi i te cilave passjell pergjegjesi penale. Nga interpretimi i dispozites se mesiperme arrijme ne perfundimin se legjislatori, marredheniet qe kane te bejne me permbushjen e rregullt zbatimin e ligjeve, si dhe per mbrojtjen e te drejtave dhe interesave te ligjshme te shtetasve, i ka cilesuar si marredhenie juridike te rendesishme, te cilat mbrohen posacerisht nga legjislacioni penal.



1. **Objekt i veprës penale**, të parashikuar nga neni 248 i Kodit Penal, janë mbrojtja e marrëdhënieve juridike të parashikuara me ligj ose ne aktet nenligjore për të siguruar veprimtarinë normale të aparatit shtetëror, si dhe mbrojtjen dhe interesat e ligjshme të shtetasve ose të shtetit, të mbrojtura posaçërisht nga legjislacioni penal nga veprimet ose mosveprimet kriminale.

2. **Nga ana objektive**, krimi i shpërdorimit të detyrës kryhet me veprime aktive të kundraligjshme ose moskryerjen e veprimeve që përben mospermbushje të rregullt të detyrës. **Per krimin e shpërdorimit të detyrës është element i domosdoshëm i anës objektive është konstatimi i lidhjes shkakesore të drejteperdrejte midis veprimit dhe mosveprimit të kundraligjshëm, mospermbushje e rregullt e detyrës dhe demtimit të interesave të ligjshme të shtetit, shtetasve dhe të personave të tjere juridik.**

Duke ju referuar interpretimit literal të dispozitës dhe praktikës gjyqësore, elementet objektive të kësaj vepre penale janë:

- a) Kryerja ose moskryerja e veprimeve në kundërshtim me ligjin,
- b) veprimet ose mosveprimet përbejnë mospermbushje të rregullt të detyrës,
- c) veprimet ose mosveprimet kryhen nga një person që ushtron funksione publike,
- d) veprimet ose mosveprimet i kanë sjelle personit ose personave të tjere përfitime materiale ose jomateriale ose kanë demtuar interesat e ligjshme të shtetit, të shtetasve dhe të personave juridike,

3. **Subjekt i kësaj vepre penale**, mund të jetë subjekt i posaçëm, çdo punonjes i ngarkuar me funksion publik. Referuar ligjit të sportit, sporti në Republikën e Shqipërisë është një veprimtari me interes publik në Republikën e Shqipërisë dhe shteti e ka deleguar këtë funksion publik tek Federatat Sportive (neni 7 dhe neni 17 i ligjit nr. 79/2017 “Për Sportin në Republikën e Shqipërisë”).

4. **Nga ana subjektive**, vepra penale e shpërdorimit të detyrës kryhet kurdoherë me dashje të drejtpërdrejte ose të tërthortë ndaj veprimeve ose mosveprimeve dhe me pakujdesi ndaj pasojave të ardhura.

Për sa parashtrua më sipër, vërtetohet qartësisht se me veprimet e ndërmarra nga shtetasi Ilir Shulku me detyrë Sekretar i Përgjithshëm i Federatës Shqiptare të Futbollit, janë konsumuar elementët e figurave të veprave penale të sipërcituara dhe ky shtetas duhet të ngarkohet me përgjegjësi penale. Këtij kallëzimi do i bashkëngjisim edhe provat mbështetëse të cilat do të vërtetojnë pretendimet e bazuara, në cilësinë e palës kallëzuese.

Për sa më sipër, i kërkoj Prokurorisë pranë Gjykatës së Rrethit Gjyqësor Tirane, regjistrimin e procedimit penal për veprat penale “Pengime për ekzekutimin e

vendimit të gjykatës”, “Veprime në kundërshtim me vendimin e gjykatës” dhe “Shpërdorim detyre”, “parashikuar nga neni 320, 321 dhe 248 i Kodit Penal, në ngarkim të shtetasit Ilir Shulku me detyre Sekretar i Përgjithshëm i Federatës Shqiptare të Futbollit.

Kallzues

Dritan Shakohoxha

Dritan Shakohoxha

